

Տ. ՄՈՎՍԵՍ ՎԱՐԴԱՊԵՏ ՍԱՐԳՍՅԱՆԻ ՔԱՐՈՉԸ՝
ԽՈՍՎԱԾ Ս. ԳԱՅԱՆԵ ՎԱՆՔՈՒՄ ՄԱՏՈՒՑՎԱԾ Ս. ՊԱՏԱՐԱԳԻՆ

(28 հունվարի 2024 թ.)

Յանուն Հօր եւ Որդւոյ եւ Հոգւոյն Սրբոյ, ամէն:

«Երանի խաղաղարարաց, զի նոքա որդիք
Աստուծոյ կոչեցցին»

(Մատթ. Ե. 9):

Սիրելի՛ հավատացյալներ,

Այսօր եկեղեցական օրացույցում Սուրբ Ծննդյան երրորդ կիրակին է, շատ օրեր չեն անցել Սուրբ Ծննդյան ու Աստվածհայտնութեան տոնից. տաղավար տոն, որի խորհուրդը խաղաղութեան առաքումն է ողջ մարդկութեանը:

Դեռեւս Հին Կտակարանի մարգարէները հայտարարում էին, որ գալիք Մեսիան կոչվելու է խաղաղութեան Իշխան (Ես. Թ. 6), որ մարդիկ ապրելու են Աստծու պատվիրանների համաձայն՝ միմյանց հետ խաղաղութեան մեջ (Ես. ԾԴ. 13):

Հիսուս Քրիստոսի Սուրբ Ծնունդն ավետող հրեշտակները հայտարարում են, որ երկրի վրա այս խաղաղութիւնը պետք է հաստատվի (Ղուկ. Բ. 14): Խաղաղութիւնն էր հայտարարված համայն մարդկութեանը, նույնիսկ Ավետարանը կոչվում էր «Խաղաղութեան Ավետարան» (Հմմտ. Հռոմ. Ժ. 15): Հիսուս Քրիստոսով Աստված հայտնվում է որպէս խաղաղութիւն կամեցող Աստված:

Սակայն պատմութիւնը ցույց է տալիս, որ հնագույն ժամանակներից սկսած՝ աշխարհը հազվադեպ է տեսել երկարատեւ եւ անխախտ խաղաղութեան շրջան:

Ուստի Տեր Հիսուս Քրիստոսի հետեւորդներն առաքելութիւն ունեն՝ ամեն ջանք գործադրել, որ կարողանան հասնել Նրա պատգամած խաղաղութեանը եւ հաստատել ցանկալի խաղաղութիւնը, որովհետեւ Աստ-

ված ասում է. «Երանի՜ խաղաղարարներին, որովհետեւ նրանք Աստծու որդիներ կկոչվեն» (Մատթ. Ե. 9): Եւ քանի որ միայն խոսքով խաղաղություն չի հաստատվում, ուստի խաղաղարարը պետք է լինի նաեւ խիզախ մարտիկ, որպեսզի հաջողի իր առաքելության մեջ:

Այո՛, սուրբգրային շատ հատվածներում է շեշտվում խաղաղությունը, սակայն այն բացատրությամբ, որ աշխարհում խաղաղությունը նախեւառաջ տիրելու է Աստծուն հավատարիմ լինելու արդյունքում: Սուրբ Գիրքը փաստում է, որ Աստված կարող էր իսպառ վերացնել պատերազմները, սակայն չարեց դա, որպեսզի դրանից ազգերը խրատվեն (Ես. Բ. 4): Իսկ քանի դեռ մարդիկ չեն խրատվել, եւ համընդհանուր բարին չի տիրել աշխարհում, ու մարդկանց մեջ հաճություն չի հաստատվել, պատերազմները միշտ լինելու են: Իսկ երբ Աստծու կամքը զորանում է, հակամարտությունները վերանում են՝ համաձայն Իր խոսքի. «Խաղաղություն եմ թողնում ձեզ» (Հովհ. ԺԴ. 27):

Միով բանիվ՝ Սուրբ Գիրքը մեզ սովորեցնում է, որ Աստված խաղաղություն է կամենում, սակայն Աստծուն հավատացող մարդիկ են, որ պիտի խաղաղություն հաստատեն՝ անհրաժեշտության դեպքում նաեւ ուժի կիրառմամբ: Իսկ խաղաղություն հաստատելու այս ճանապարհին, հաղթանակ ունենալու համար, անհրաժեշտ է հավատարմություն Տիրոջ սահմանած օրենքներին, որովհետեւ հաղթանակը ձեռք է բերվում ոչ թե շատ զորքով, այլ այն զորությամբ, որ երկնքից է գալիս (Ա. Մակ. Գ. 19), որպեսզի կատարվի ապագա պատերազմների հաղթահարման մասին Օսեեի մարգարեությունը. «Այն օրը ուխտ կկնքեմ նրանց հետ... եւ աղեղը, սուրն ու ճակատամարտը կվերացնեմ երկրից եւ կբնակեցնեմ քեզ հույսով» (Օսեե. Բ. 18):

Սուրբ Եկեղեցին փաստել է, որ հանուն խաղաղության՝ միշտ պետք է պատրաստ լինել պատերազմի, եւ պատերազմ պետք է մղել հենց խաղաղությունը վերահաստատելու եւ արդարությունը վերականգնելու համար: Քանի որ Աստծու եւ բարեկամի նկատմամբ սերն ստիպում է քրիստոնյաներին՝ արդարացի խաղաղություն փնտրել, իսկ այդ խաղաղությանը հասնելու համար ամենապատշաճ միջոցը բանակն է:

Ահա այս լույսի ներքո են երեւում ՀՀ ԶՈՒ-ի հիմնական առաքելությունն ու նշանակությունը: Սիրելիներ, հանուն խաղաղության ու անվտանգության բազմաթիվ պատերազմներ մղած ու այսօր էլ պատերազմի սպառնալիքներին դիմակայելու պատրաստ Հայոց բանակը տոնում է

կազմավորման 32-րդ տարեդարձը, որի առիթով շնորհավորում եմ ամեն-
քիս: Հայոց բանակի համար, հավարտ Ս. Պատարագի, կկատարվի Հան-
րապետական մաղթանք: Բանակն է շարունակում մնալ այն միակ ուժը,
որը կարող է խաղաղություն հաստատել ու ապահովել պետության
անդորրը:

Մեր երկրի համար Աստծու պատգամած խաղաղությունը հաստա-
տողն ու պարտադրողը ՀՀ զինված ուժերն են, իսկ երանելի խաղաղա-
րարները՝ այդ նույն Զինված ուժերի հավատացյալ սպաներն ու զին-
վորները: Տեր Հիսուս Իր կյանքը տվեց որպես խաղաղարար, եւ սա այն
գինն է, որ շատերը վճարեցին՝ մեր երկրում խաղաղություն հաստատելու
համար: Թող Աստված լույս դարձնի նրանց հոգիները, սփռի եւ մխիթա-
րի նրանց հարազատներին:

Թող Տեր Հիսուս Քրիստոսի սերը, շնորհներն ու զորակցությունը
միշտ լինեն Հայոց բանակի հետ եւ նրա յուրաքանչյուր զինծառայողի
պարգեւեն ամեն վայրկյան խաղաղությունը պարտադրելու կամք ու
վճռականություն, ամեն:

